

# Ehekushon

Kriminalidat ta asotá nos islanan. Nos ta preokupá pa e ola di violensia asesinato ku korant ta publiká diariamente. Nos ta fadá, frustrá, i kansá di loke a para bira un plaga. Na lugá di haña solushon pa e epidemia di agreshon, kos ta bai di malu pa pió! Ta parse ku bida tin poko balor awendia.

Un sistema efektivu pa konsientisá nos pueblo di e balor di e ser humano i talbes pone un pusibel asesino pens'é bon promé ku e ta lòs un tiro, ta pa nos legalisá ehekushon pa asesinato.

Sin duda algun hende lo protestá ku e proposishon aki ta inhumano i krue! Ma kitamentu di bida di un persona na un forma violento no ta inhumano i krue? Ta hustu pa pone e burdugu tras di trali, anto despues di un par di aña dun'é su libertat pa e por gosa su famia, amigunan, trabou, deporte, èts...privilegionan ku su víktima nunca hamas por eksperensíá?

Otronan talbes ta argumentá ku Beibel ta bisa "stima bo próhimo," no "ehekutá bo próhimo." Esei ta bèrdat. Ma nos tin ku paga bon tino ora nos ta lesa Beibel. Mayoría teksto (por ehèmpel "stima bo próhimo") ta dirigí na tur hende. Ma algun teksto ta duna informashon spesífiko na e gobernantenan di un pais. Levitiko 24:17-20 ta un ehèmpel di esaki: "Si un hòmer kita bida di un ser humano, mester laga mat'é...Si un hende hasi daño na su próhimo, méskos ku el a hasi, asina mester hasi ku né tambe: gòlpi pa gòlpi, wowo pa wowo, djente pa djente, méskos ku el a hasi daño na un hende, asina mester hasi ku né tambe. Esei ta instrukshon pa mandatarionan; no pa kualke suidadano apliká.

Dios ta un Dios di amor. Ma E tambe ta un Dios HUSTU! Beibel klaramente ta reflehá Dios Su hustisia ora e ta preskribí ehekushon pa un asesino.

Skritura ta deklará ku Dios a krea hende na un forma úniko. En kontraste di tur bestia, Dios a krea hende den Su propio imagen. P'esei BIDA HUMANO TA SAGRADO! Despues di e diluvio, Dios a duna Noe instrukshon ku ta válido pa tur gobièrno di tur nashon di tur tempu: "Ken ku drama sanger di hende, hende lo drama su sanger, pasobra segun imágen di Dios El a traha hende" (Gènesis 9:6). Hopi nashon a bandoná e ordenansa aki, pretendiendo ku nan tin mas kompashon ku Dios. Komo resultado, nan ta sufri e konsekuensia di e desishon aki: bida humano a bira barata.

Ora Dios a forma e nashon di Israel, El a duna nan leinan úniko. E leinan aki a demandá morto pa 22 diferente krimen: rebeldiá kontra, maldishoná òf dal mayornan; kibra sabat; sekuestro; asesinato; adulterio; sierto prostitushon; violashon; incestu; homoseksualidat; bestialidat; hasi bruha; blasfemá Dios; èts. E leinan aki i e kastigu ku nan a eksigí tabata válido pa un nashon so, Israel. Pa tur otro nashon, Dios ketu bai a eksigí kastigu di morto pa solamente un krimen: asesinato. E lei aki no a kambia. E kastigu no a kambia tampoko.

Beibel tambe ta kòrda nos ku "no ta pòrnada e (representante di gobièrno) ta karga spada, pasobra e ta minister di Dios, un vengadó pa kastigá esun ku ta hasi malu" (Romanonan 13:4). Den e era ku e apòstel Pablo a skirbi esaki, spada tabata usá pa mantené òrdu i pa ehekushon. Awendia polis ta kana ku revòlver pa mantené òrdu. Ma ni e spada, ni e revòlver t'ei pa prònk. Polis tin e outoridat pa us'é. I e representante di gobièrno ku tin e tarea di ehekutá e asesino, tambe ta outorisá pa Dios pa kita bida. Ademas e apòstel Pablo a demonstrá ku ehekushon pa sierto krímen ta korekto ora el a deklará dilanti un mandatarario, "Si mi a hasi algu malu òf kometé algun kos ku ta meresé morto, mi no ta nenga di muri..." (Echunan 25:11)

Ta bon pa kòrda tambe ku un sentensia di morto lo tin un afekto mas positivo riba un pueblo--miedu pa kometé asesinato--si e proseso hurídiko no tarda pa duna e kastigu meresé. Beibel ta bisa: "Pasobra sentensia kontra un echu di maldat no ta wòrdu ehekutá lihé, p'esei kurason di e yunan di hende den nan ta kompletamente dispuesto pa hasi maldat" (Eklestias 8:11).

Palabranan duru? Kisas. Pero e alternativa ta mas duru: sigui mira bida di hende bira mas barata dia pa dia; sigui lesa den korant di e plaga ku ta asotá nos islanan: hinkamentu, tiroteo, i asesinato.